

# TUSI TAIALA

FUAFUAGA TATAU MO LE PULEA MA LE VA'AIA LELEI O I'A  
MA FIGOTA O LE GATAIFALE

---



## SAUNIA:

Pule mamalu a Alii ma Faipule ma tagatanu'u o le afio'aga o SASINA faatasi ai ma le lagolagosua a le Vaega o Faigafaiva.

Matagaluega o Faatoaga ma Faigafaiva (MAF)

# FAASOLOGA

1	UPU TOMUA .....	3
1.1	Autu o le Taiala .....	3
2	FAAMATALAGA O LE AFIOAGA .....	4
2.1	Faigafaiva ma Faafitauli i Sasina.....	5
2.2	Aotelega o Tulafono Faale-nuu tau Faigafaiva i Aso ua Mavae.....	6
3	O LENEI FUAFUAGA TATAU/TAIALA .....	6
3.1	Tapenaga o le Taiala.....	6
4	FUAFUAGA FAATAATITIA MA TULAFONO.....	7
4.1	Tulafono Autu o Faigafaiva.....	7
4.2	Tulafono Faatonutonu o Faigafaiva (mo le Laiti o l'a ma Figota) .....	8
4.3	Tulafono Laiti a Afioaga .....	8
5	FUAFUAGA FAATAATITIA MA TULAFONO A SASINA.....	8
5.1	Faamalositia Tulafono faale-nuu e Faasaina ai Faigafaiva le Talafeagai .....	8
5.2	Taofia le Faiva o le Fa'amo'a poo Tu'iga .....	9
5.3	Ia Faasaina Upega ma Tili Matanini'i.....	9
5.4	Faia le Nofoga Faasao o le Gataifale.....	10
5.5	Ia faasaina le Fagotaina o l'a ma Figota Laiti .....	10
5.6	Taofia le Faatafunaina o Gataifale o Sasina .....	11
5.7	Taofia Fagotaga a tagata ese i tuapapa e faasolo atu i le vaega fuafuaina mo atinae mo tagata tafafao mai atunuu i fafo (tulisi) .....	11
6	TALOSAGA A LE AFIOAGA.....	12
7	UPU MULIMULI .....	12
8	SUI AUAI I FONOTAGA MA FAATALATALANOAGA.....	12

## **Fa'alupega o Sasina**

**Afifio o Aiga sa Tupuã  
Ma Aiga sa Malietoã  
Ma le Mamalu i le Faletolu**

## 1 UPU TOMUA

O faigafaiva i gataifale e taua tele i afioaga o Samoa aua le fofoga taumafa faapea le fesoasoani i le tamaoaiga. I le tele o afioaga, latou te le o faatauaina le pulea tatau ma le vaaia lelei o punaoa ma le siosiomaga o le gataifale. O le faia ma le faaaogaina o ituaiga faigafaiva faa-onapo-nei e iai mea manava, upega faepa tili mataninii ina ia tele ai i'a maua ua ave alea ma auala o le faaitiitia ma le faaleagaina ai o nofoaga o i'a, figota ma meaola o le sami. O nisi gaiioiga ua aafia ai le gataifale e pei o le tanumia o vaega o le sami mo eleele-fou (fanua) ma faigafaiva le talafeagai pei o fanaia, ava niukini, vailaau oona ma faamo'a /tu'iga.

O nei faafitauli o lo o tulai mai pea i gataifale o si o tatou atunuu, ua matua faaitiitia ai i'a ma figota ae le gata i lea o aafiaga i mala faalenatura e pei o galu malolosi faapea matagi ma afa pei o Ofa (1990), Valelia (1991), Heta (2004) ma le galu lolo/tsunami (2009).

I aso ua mavae sa faalagolago tele le fofoga taumafa o tagata Samoa i i'a ma figota o le sami ae ona o faafitauli pei ona ta'ua faapea le soona fagotaina ua faapea ona faatamaia ma faaitiitia ai nei punaoa o le sami. E le gata i lea, ua vaaia le taugata, ua faapea ai ona faamoemoe tagata Samoa i nei ona po i meaai tuu aisa ma meaai tuuapa o lo o faatauina mai atunuu i fafo. O se atugaluga lea o loo iai i le taimi nei ae le gata i lea o le faamoemoe tele i le tupe aua mea taumafa i aso uma.

O le polokalame faasao ma le pulea tatau o gataifale o Samoa na amata mai e le Vaega o Faigafaiva i le tausaga 1995 i le fesoasoani tau tupe mai le Malo Ausetalia (AusAid) mo le lima tausaga. O lenei polokalame ua faaauiaina e le Malo o Samoa e ala i le Vaega o Faigafaiva ma e faatauaina ai le fesootai ma le galulue soosoo tauau ma afioaga aua le pulea tatau ma le vaaia lelei o latou gataifale. O taualumaga o le polokalame e aafia ai le soalaupuleina ma le fausiaina o Tusi Taiala e tamauiaina ai fuafuaga faataatitia a afioaga faapea le fesoasoani a le Vaega Faigafaiva.

Ona o le taua o lenei polokalame, ua a'e ai se tofa i le afioaga o Sasina e galuelue ma le Vaega o Faigafaiva e fausia ai lenei Tusi Taiala aua ni fuafuaga faataatitia faapea ni tulafono laiti e lima taitaia ai le afioaga i le pulea tatau o latou punaoa o le gataifale.

O fuafuaga faataatitia i lenei Tusi Taiala e unaia ai le pulea tatau ma le vaaia lelei o le faaaogaina o le tamaoaiga o le gataifale o le afioaga o SASINA, i Savaii.

### 1.1 Autu o le Taiala


O autu nei sa faatalatalanoaina ma mallie autasi i ai vaega uma o le afioaga:

- Pulea tatau ma vaaia lelei punaoa ma le siosiomaga o le gataifale;
- Faatupulai i'a ma Figota aua le fofoga taumafa ma le tamaoaiga o le afioaga aemaise tupulaga i le lumanai;
- Faailogaina se vaega o le gataifale (sami) e avea ma nofoaga faasao;
- Siitia le silafia ma le malamalama o tagatanuu i le taua o le gataifale mo le soifua manuia.

## 2 FAAMATALAGA O LE AFIOAGA

O *SASINA* e i le ogatotonu i matū o le motu o Savai'i (vaai i le faafanua) i le itumalo o Gagaifomauga III. O le toatele o ona tagata e nonofo latalata i le sami aemaise le itu i sasa'e o ona laufanua laugatasi maualalo. O le faitau aofai o ona tagata i le 2006 e 400 (Ofisa o Faamaumaga, 2006). O nisi ua faigamalaga atu ma aumau i Niusila, Ausetalia, Amerika ma isi atunuu i fafo.

**Ata 1: Faafanua o Savai'i o lo o faailoa mai ai le afioaga o Sasina**



**Vaega Faufautua (Ofisa Faigafaiva, 2010)**

E pei o isi afioaga o Samoa, o Sasina e mamalu tele pulega a alii ma faipule. O le aumaga e feagai ma galuega mamafa i totonu o le afio'aga faapea le faiva o le tautua ae o faletua ma tausii faapea sa'ao e faatinoa isi galuega taua e lagolagosua i le atinaeina o le afioaga.

E lima tapuaiga i totonu o Sasina, e pei o le Ekalesia Faapotopotoga Kerisiano i Samoa (EFKS), Ekalesia Metotisi, Ekalesia Katoliko, Assembly of God faapea ma le lotu Baha'i.



**Malumalu EFKS**



**Malumalu Katoliko**

E iai foi le aoga tulaga-lua (Primary School) o lo o aoga ai alo o le afoaga.



**Malumalu – Assembly (AOG)**



**Aoga Tulaga Lua (Primary School)**

## 2.1 Gataifale o Sasina

E matagofie ma laugatasi lafanua o le afoaga aemaise le itu i sasae se i vagana le itu i sisifo e fai sina maupu'epu'e ma papa. O le a'au pe a ma le 200-250 mita le mamao mai le matafaga i le itu i sasae o le afoaga. O le itu i sisifo o le gataifale e fai si maualuga o papa ma e loloto foi ma pe a ma le 50-100 mita mai le aau. E iai foi vaitaele latalata i le sami o lo o faasimā ma vaaia lelei e tamaita'i i le falekomiti i autafa ane aua o lo o faaaogaina e le afoaga.



**Laufanua o Sasina**



**Vaitaele o le afoaga**

## 2.2 Faigafaiva ma Faafitauli i Sasina

E toatele tagata e faalagolago ma fagotaina le gataifale o le afoaga mo le fofoga taumafa faapea le tamaoaiga aemaise mea fai a aiga, ekalesia faapea faalavelave i totonu o nuu. E tele ina faatino e alii fagotaga mauulu i le aloalo faapea tua'au, ae o tamaitai e fagotaina figota ma isi taumafa sami e pei o fugafuga, 'alu'alu, tuitui, matalelei ma isi.

O faiva i tuaau e tele ina maua mai ai malauli, laea, ātu, ume ma isi i'a alalo ae o le tele o fagotaga masani i le aloalo e maua mai ai fuga, pone, alogo, manini, mataleele, anae ma isi. E le gata i lea o figota ma meaai sami e pei o faisua, aliao, alili, pusi, fe'e, tuitui, limu ma isi figota.

I le vaitaimi o le 1970 agai i le 1990 sa tau faaletonu ai le gataifale ona o le soona faagotaina e tagata aemaise

le faaogaina o faigafaiva le talafeagai pei o ava niukini, vailaau oona, fanai'a ma isi metotia. E le gata i lea ae o mala faanatura pei o le afa o Ofa i le 1990 ma Valelia i le 1991. Sa avea lea ma ala sa faaititia ai i'a ma figota faapea le faaleagaina o amu ma a'au.

### 2.3 Aotelega o Tulafono Faale-nuu tau Faigafaiva i Aso ua Mavae

Ona o nei faafitauli pei ona ta'ua, na amata ai loa ona faasa e le afioaga o Sasina faigafaiva le talafeagai. O le ala foi lea ua amanaia ai e le afioaga lenei polokalame mo le Pulea tatau ma le Vaaia lelei o gataifale ina ia aoga mo alo ma fanau i le lumanai.

E iai tulafono faalenuu e puipuia ai le gataifale ma lona tamaoaiga e pei o le:-

- faasaina o fanai'a;
- faasaina o ava niukini ma vailaau oona;
- faasaina o faigafaiva pei o tu'iga ma faamo'a.

O nei tulafono o lo o ai'ia malosi i tulafono autu o faigafaiva ma ua amanaia e le pulega mamalu a Alii ma Faipule o Sasina. E le gafatia e le malosi faaletulafono a le malo ona malu puipuia le siosiomaga o le gataifale ona o le toagaogao o le afaigaluega ma le utiuti o le seleni e faamalosia ai tulafono i nuu taitasi o Samoa. O se tulaga lelei tele le galulue faatasi o Matagaluega faapea afioaga ina ia latou faamalosia tulafono.

## 3 O LENEI FUAFUAGA TATAU/TAIALA

O le faamoemoe mauuluga o le malo, ia mau pea Samoa ma ia faaleleia le soifua manuia o tagata lautele aemaise le faatupulaia pea o mea taumafa pei o taumafa sami. O lea e manaomia ai le galulue faatasi o tagata uma o le afioaga i soo se faatinoga lelei, e tua iai e le gata i le taimi nei ae faapea le lumanai. E pei ona ta'ua i le amataga, o le AUTU na talanoaina ma autasi uma iai finagalo o vaega taitasi o le afioaga i taimi o faatalatalanoaga:

- Ia pulea tatau ma vaaia lelei le siosiomaga o le gataifale;
- Toe faatupulaia punaoa ma tamaoaiga o le gataifale aua tupulaga i le lumanai;
- Siitia le silafia ma le malamalama o tagatanuu i le taua o le gataifale mo le soifua manuia.

O lenei Taiala ua faamoemoe ina ia faaogaina pea i le lumanai e tomatau ai galuega faatino a le komiti ma le afioaga faapea le lagolagosua a le Vaega o Faigafaiva, ma e mafai ona toe iloilo i le ta'i ono masina aua ni suiga e finagalo i ai le afioaga. *E le mafai ona suia e le Matagaluega ma le Vaega o Faigafaiva ni fufuaga i totonu o lenei Tusi Taiala sei vagana ua malilie autasi i ai le Komiti ma le afioaga.*

### 3.1 Tapenaga o le Taiala

O lenei Tusi Taiala sa faatino lava e le pule a alii ma faipule ma le afioaga o Sasina faatasi ai ma le lagolagosua a le Vaega o Faigafaiva. Na faatoai mai le manaoga o le afioaga i le Vaega o Faigafaiva e le susuga i le tofi pulenuu o Vagana Faasea.

#### 3.1.1 Fono Muamua a le Afioaga ma le Vaega o Faigafaiva

Sa usua le fonotaga aloaia muamua a Sasina ma le Vaega o Faigafaiva i le aso 03 Tesema 2009. Sa faamalamalamaina ai e le Ofisa le aoga ma le taua o lenei polokalame ma sa taliaina ai loa e afioaga ma faapea ai ona faagaioia le Fuafuaga Tatau poo le Tusi Taiala.

### **3.1.2 Faatalatalanoaga ma Vaega o le Afioaga**

O le aso 15 Tesema 2009 sa faataunuuina ai fonotaga ma vaega eseese o le afioaga. Sa tuufaatasia le vaega o matai ma aumaga ona o le toagaogao o le afaigaluega ma sa faatino foi faatalatalanoaga ma le vaega o tina ma tamaitai. Sa talanoaina i ia vaega faafitauli o le gataifale o lo o alia'e i le afio'aga, atoa ai ma ni fofo talafeagai e ono foia ai. E le gata i lea o le faia o ni tulafono a le afioaga e faaamalosia ai le puipuia ma le vaaia lelei o le gataifale.

### **3.1.3 Komiti Faufautua o le Faasao i le Gataifale**

I lenei Komiti o lo o aofia ai sui na filifilia mai i vaega eseese o le afioaga e latou te molia finagalo fa'aalia i le fono a matai. O le Komiti latou te tuufaatasia faamaumauga ma faamatalaga mai vaega taitasi ma tapenaina se ata faataitai o le Fuafuaga Tatau/Taiala. O lenei komiti o le a nafa ma le faatinoga o matafaioi ma galuega a le afioaga e pei ona ta'ua i le Taiala faapea le soosoo tauau ma le Vaega o Faigafaiva.

### **3.1.4 Pasiaina o le Tusi Taiala i le Fono Mulimuli**

O le fonotaga mulimuli i le aso \_\_\_\_\_ na tuuina aloaia atu ai lenei Fuafuaga Tatau / Tusi Taiala e le Komiti filifilia a le afioaga ma le Vaega o Faigafaiva i le fono mamalu a alii ma faipule mo le pasiaina. O le fono mulimuli foi lea e faaiu ai mafutaga faafonotaga, ae amata ai le faatinoina o galuega ma matafaioi o lo o i totonu o le Tusi Taiala.

## **4 FUAFUAGA FAATAATITIA MA TULAFONO**

### **Otootoga**

O fuafuaga faataatitia o ni gaioiga ua faamoemoe e faatino ina ia foia ai faafitauli ua faaalua mai e vaega eseese o le afioaga. E lua vaega o fuafuaga faataatitia ua fuafuaina:

- i) Fuafuaga faataatitia ua faaagaga e faatino e le afioaga;
- ii) Fuafuaga faataatitia mo le Vaega o Faigafaiva lea e patino lava i le tuuina atu o fautuaga mo le nofoaga FAASAO i le gataifale faapea atinae ma mataupu tau faigafaiva.

O nisi o tulafono ua ta'ua i lalo o lo o faamamafa ai tulafono autu a le malo e puipuia, faaoga, ma pulea tatau ai punaoa ma alāmanuia o le gataifale.

### **4.1 Tulafono Autu o Faigafaiva**

O le Tulafono Autu o Faigafaiva 1988 ua avea ma taiala mo puipuiga, galuega ma isi vaega tau faigafaiva e pei:-

- o le faasaoina, puleaina ma le atina'eina;
- faasaina o faigafaiva le talafeagai;
- faaamalosia le laiseneina o vaa-fagota mo fagotaga faapisinisi faapea le
- vaaia o taiala ma maliega aua le pulea tatau o faigafaiva i le va ma atunuu i fafo.



O nei vaega o le tulafono e le o lava le silafia e le toatele o tagatanuu o Samoa aemaise le faamalosia ma le usitaia e afioaga. Ona o nei faafitauli ua taumafai ai le Polokalame mo le Pulea Tatau ma le Vaaia Lelei o Gataifale o afio'aga e unaia nisi o vaega o lo o faatinoina nei e pei o nofoaga faasao faapea aoaga mo le faamalamalamaina ma le silafia e le mamalu o le atunuu.

#### 4.2 Tulafono Faatonutonu o Faigafaiva (mo le Laiti o l'a ma Figota)

O le Tulafono Faatonutonu 1995, e faatapulaaina ai le laiti o l'a ma Figota e fagotaina ma o lo o faatauina ai nisi o vaega e pei o:-

- aiāiga mo le puipuiga ma le faasaoina e aofia ai le faasaina ona fagotaina ma le faatauina o nisi o ituaiga o l'a ma figota;
- mea fagota e faasaina ma pole mo fagotaga (faigafaiva i tuaau);
- fua faatapulaa o l'a ma figota e faatagaina ma isi.

#### 4.3 Tulafono Laiti a Afioaga

O Tulafono Laiti a nuu ma afio'aga ua amanaiaina e le faamasinoga. O se tasi lea o auala ua tuu sa'o ai e le Malo le malosia i nuu ma afioaga e mafai ai ona latou molia i le tulafono soo se tagata e lē usitaia tulafono ua aiaia i totonu o lena Fuafuaga Tatau / Tusi Taiala a le afioaga o SASINA.

O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoaiga ma lona siosiomaga mo se lumanai manuia. O tulafono laiti e soalaupule ma autasi iai le pule mamalu a alii ma faipule o afioaga taitasi faapea le fesoasoani a le Vaega o Faigafaiva.

### 5 FUAFUAGA FAATAATITIA MA TULAFONO A SASINA

#### 5.1 Faamalosia Tulafono faale-nuu e Faasaina ai Faigafaiva le Talafeagai

O nisi o auala tau faigafaiva ua mautinoa le ogaoga o latou aafiaga i le faatamaiaina o nofoaga taua mo le tele o l'a, figota ma isi meaola o le gataifale. O nei faigafaiva le talafeagai e aofia ai ava niukini, fanaia, vailaau oona faapea faamo'a/tu'iga, ua le gata ina faatamaia ai se vaega tele o le gataifale ae ua faapea foi ona umi se taimi e toe faaleleia ai le tamaoaiga o le gataifale.

Talu ai ona o le tele o aafiaga i le gataifale o lea ua a'e ai se finagalo autasi i le fonu a alii ma faipule faapea le komiti ua filifilia ina ia matua faamalosia loa tulafono o Faigafaiva ma ia toe unaia ma faamamaluina le faasaina o faigafaiva le talafeagai.

##### 5.1.1 Tulafono

Mo le mamalu o le atunuu faatasi ai ma tagata nuu o le afioaga o Sasina:-

***“Ua matua faasaina lava ona toe faatinoina faigafaiva le talafeagai e pei o ava niukini, fanaia faapea ma vailaau oona.”***

O le puipuiga ma le faamamaluina o lena tulafono o le a i aao o alii ma faipule faatasi ai ma le lagolagosua a tagata o le afioaga.

### **5.1.2 Faasalaga**

O soo se tagata o le afioaga o Sasina e solia lenei tulafono, o le a faasalaina i le \$100.00 A le usitaia o le a molia loa i tulafono laiti po o le tulafono autu o Faigafaiva.

### **Fuafuaga faataatitia a le Vaega o Faigafaiva**

O le a fesoasoani le Vaega o Faigafaiva e faamalamalama tulafono i le afioaga faapea le moliaina o i latou e solia lea tulafono.

## **5.2 Taofia le Faiva o le Fa'amo'a poo Tu'iga**

### **5.2.1 Tulafono**

Mo le mamalu o le atunuu faapea tagatanuu o Sasina:-

***“Ua matua faasaina ona toe faatinoina faiva o le fa'amo'a ma tu'iga/sa'euga i gataifale o lenei afioaga.”***

O le pui puiga ma le faamamaluina o lenei tulafono o le a i aao o alii ma faipule faatasi ai ma le lagolagosua a tagata o le afioaga.

### **5.2.2 Faasalaga**

Soo se tasi e solia lenei tulafono o le a faasalaina i le \$100.00. A le usitaia, o le a molia loa i tulafono a le Vaega o Faigafaiva.

## **5.3 Ia Faasaina Upega ma Tili Matanini'i**

O le faaogaina o upega ma tili mataninii ua matauina le tele o i'a laiti ua faatamaia ai. Ua iai le talitonuga o le a faaititia i'a maua ma i'a lapopoa e mafai ona tautuufua ma fanafanau pe'a faaauau pea le faaogaina o nei ituaiga o faigafaiva. Ona o le tūga o aafiaga e o'o iai i'a maua ona o upega ma tili mataninii ua faaalua mai ai e le afioaga lo latou matua lagolagoina o le tulafono a le malo ua iai nei mo le faatapulaaaina o matāupega ma tili mataninii.

### **5.3.1 Tulafono**

Mo le mamalu o le atunuu faatasi ai ma tagata nuu o le afioaga o Sasina:-

***“Ua matua faasaina lava ona toe faatinoina faigafaiva e faaogaina ai upega (matāupega itiiti ifo ma le 50mm/2.0 inisi pe a fua sūsū) ma tili mataninii (matāupega itiiti ifo ma le 30mm/1.2 inisi pe a fua sūsū) i gataifale o Sasina.”***

O le pui puiga ma le faamamaluina o lenei tulafono o le a i aao o alii ma faipule faatasi ai ma le lagolagosua a tagata o le afioaga.

### **5.3.2 Faasalaga**

O soo se tagata o le afioaga na te solia lenei tulafono o le a faasalaina i le \$100.00. O le lē usitaia o lea faasalaga o le a molia loa i le tulafono o Faigafaiva.

### **Fuafuaga faataatitia a le Vaega o Faigafaiva**

O le a lagolagosua le Vaega o Faigafaiva e ala i lana polokalame fesoasoani o le tuuina atu o faamatalaga e faamautuina ma faamalamalama ai lenei tulafono.

## 5.4 Faia le Nofoga Faasao o le Gataifale

Ua malilie le afioaga e faailogaina se nofoaga o le gataifale i le aloalo e avea ma nofoaga faasao e malu ma nonofo ai i'a, figota, amu ma isi meaola o le sami. O le autu taua o le faasaoina ai o amu faapea i'a, figota ma isi meaola o le sami ina ia mafai ona maua e nei meaola se nofoaga malu e ola, tautuufua ma fanafanau ai aemaise le toe faatupulaia pea aua le fofoga taumafa ma le tamaoaiga.

### 5.4.1 Tulafono: Faasaina Faigafaiva i totonu o nofoaga fa'asao

Mo le afioaga o Sasina faapea tagata mai isi afioaga:-

***“Ua matua faasaina ona fagotaina pe solia le nofoaga fa'asao o Sasina”.***

O le puipuiga ma le faamamaluina o lenei tulafono o le a i aao o le pule mamalu a alii ma faipule faatasi ai ma le lagolagosua a le afioaga.

### 5.4.2 Faasalaga

Mo soo se tagata o le afioa'ga e solia lenei tulafono, o le a faasalaina i le \$100.00. O tagata ese mai isi afioaga o le a molia sa'o i tulafono laiti a le afioaga.

## 5.5 Ia faasaina le Fagotaina o l'a ma Figota Laiti

O le fuafua tatau o le fagotaina mai o i'a ma figota o se itu lelei tele ma talafeagai mo le faasaoina ma le toe faatupulaia o meaola o le gataifale. O lenei fuafuaaga o le a mafai ai ona maua le avanoa e i'a ma figota laiti e tutupu ma fananau ai a'o le'i fagotaina mai. Afai e pueina ma fagotaina mai i'a, pa'a ma figota ae lei oo i le lapopoa/matua e fanafanau ai, o lona uiga ua le mafai ona fanafanau ma maua ai nisi meaola ma punaoa o le sami. Afai la o le a faaauauina pea lea tulaga, o le a saga faaitiitia pea le faitauaofai o i'a ma figota ma faasolo lava ina mou malie ese atu.

### 5.5.1 Tulafono

Mo le mamalu o le atunuu faatasi ai ma tagata nuu o Sasina:-

***“Ua matua faasaina ona toe fagotaina i'a ma figota laiti mai le gataifale o Sasina e pei ona aiāia i le Tulafono Faatonutonu o Faigafaiva a le Malo.”***

O le puipuiga ma le faamamaluina o lenei tulafono o le a i aao o alii ma faipule faatasi ai ma le lagolagosua a le afioaga.

### 5.5.2 Faasalaga

Mo soo se tasi na te solia lenei tulafono, o le a tuina atu i le pule a alii ma faipule. A le usitaia, o le a molia loa i tulafono faatonutonu o faigafaiva.

### ***Fuafuaga faataatitia a le Ofisa o Faigafaiva***

O le a fesoasoani atu pea le Vaega o Faigafaiva i le faamalamalamaina o Tulafono Faatonutonu o Faigafaiva ma tufaina atu pepa o faamatalaga e faamalamalama atili ai mo le silafia e le mamalu o le afioaga.

## 5.6 Taofia le Faatafunaina o Gataifale o Sasina

O le lafoai o lalisi ma otaota i le sami ma le matafaga ua avea ma faapogai o le tele o faafitauli aemaise lava i lalisi e pei o uamea, pepa iila, atigi fagu, atigi apa, fagu pa'u ma isi otaota.

O fuafuaga a le afioaga o le faia lea o galuega e aoina ese ai lalisi aemaise pepa i'ila, u'amea ma atigiapa mai le gataifale.

### 5.6.1 Tulafono

Mo le afioaga faapea le lautele:-

***“Ua matua faasaina lava ona toe faatafunaina le gataifale, ma ua faasaina le lafoai o lalisi pei o atigi apa, uamea, pepea iila ma isi i gataifale o le afioaga”.***

O le faatinoga, pui puiga ma le faamamaluina o lenei tulafono o le a i aao o alii ma faipule faatasi ai ma le lagolagosua a le afioaga.

### 5.6.2 Faasalaga

Mo le lautele faapea tagata o le afioa'ga e solia lenei tulafono, o le a faasalaina i le sala tupe e \$50.00. A le usitaia lenei tulafono o le a molia loa i tulafono laiti a le afioaga.

### ***Fuafuaga faataatitia a le o Faigafaiva***

O le a fesoasoani le Vaega o Faigafaiva e tufatufa atu ma faamalamalama pepa o faamatalaga i le afioaga, mo le silafia e le lautele o le tele o aafiaga mai le lafoai o otaota ma lalisi i le gataifale.

## 5.7 Taofia Fagotaga a tagata ese i tuapapa e faasolo atu i le vaega fuafuaina mo atinae mo tagata tafafao mai atunuu i fafo (tulisi)

### 5.7.1 Tulafono

Mo le au fai vaafagota (alia):-

***“Ua matua faasaina lava gataifale pei ona ta'ua i luga (tuapapa ma le 100 mita mai le papa) ona toe fagotaina e ni tagata ese”***

### 5.7.2 Faasalaga

O se tasi na te le utagaia lenei tulafono o le a faasalaina i le \$2,000 po o le faia iai o le finagalo o alii ma faipule pe molia i tulafono laiti a le afioaga.

## 5.8 Faasaina faiva (lama moli uila, fasi faisua) i tuaau o lenei nuu

### 5.8.1 Tulafono

E faasilasila atu i le mamalu o le atunuu o lo o faia fagotaga o le lama moli uila, fasi faisua, faga i le ao i tuaau o lenei nuu agai atu i le vaega fuafuaina mo atinae tulisi. Ua tasi alii ma faipule ua matua tapu lava ona toe faatino nei fagotaga.

### 5.8.2 Faasalaga

O soo se tasi e le utagia mai o lenei tapu o le a faasalaina i le \$2,000 po o le faia iai o le finagalo o alii ma faipule pe molia i le tulafono.

## 6 TALOSAGA A LE AFIOAGA

Ua talosagaina e le afioaga o Sasina le fesoasoani a le Vaega o Faigafaiva ina ia silasila ane pe mafai ona faatinoina nisi o atina'e ma fuafuaga pei o le:-

- Faia o se pa tilapia;
- Figota talafeagai mo le fa'atoagaina pei o faisua, aliao ma isi;
- Faia se talosaga i le UNDP/JICA mo se fesoasoani e faaleleia ai atina'e e pei o le faailogaina o nofoaga faasao faapea atina'e talafeagai;
- Pole Fagota i tuaao mo fagotaga a le afioaga;
- Vaa alamini (dinghy) ma se afi vaa (15 HP) aua le vaaia o le faasao aemaise le faigafaiva i vaega ua faasaina (pei o tuapapa).

### **Fuafuaga Faataatitia a le Ofisa o Faigafaiva**

Ua i ai le maliega a le Afioaga faapea le Komiti (KFVL) ma le Vaega o Faigafaiva o le a toe auiliiliina lenei Fuafuaga Tatau po o le Tusi Taiala pe a maea le ono (6) masina talu ona pasiaina.

## 7 UPU MULIMULI

O le auai o le afioaga o Sasina i le Polokalame mo le Pulea ma Vaaia Lelei o le Gataifale ua mautinoa le faatauaina o le gataifale aemaise le soifua manuia o tagata lautele o le afioaga. O le manuia ma le alualu i luma o lenei polokalame e faalagolago lea i le galulue faatasi o le afioaga i le Pule Mamalu a Alii ma Faipule, Komiti a Tina, Aumaga aemaise o le Malo e tau ala mai lea i le Vaega o Faigafaiva i le faatinoina o fuafuaga faataatitia ua maea ona soalaupule i fonotaga ma faatalatalanoaga.

O lenei polokalame o se galuega e umi se taimi e faaatali ai lona fua mai ae peitai ua mautinoa le toe faaleleia ai o punaoa ma alamanuia o le gataifale e faalagolago iai le afioaga. O lenei fuafuaga e mo le manuia o tagatanuu lava o le afioaga faapea tupulaga i le lumanai.

## 8 SUI AUAI I FONOTAGA MA FAATALATALANOAGA

### **Sui o le Komiti a Sasina**

<b>MATAI</b>	<b>AUMAGA</b>	<b>TAMAITA'I</b>
Vagana Faasea (pulenuu)	Saulo Sagote	Upumalie Vagana
Leituala Tuitoga	Tulali Vagana	Potoa'e Leituala
Ala Sakai	Uepa Leasi	Tautino Togoju
Seve Avaula	Arona Togoju	Ata Lealofi
Lealofi Faleata	Elia Samasoni	Amasunu Vagana
Togoju Uisiki		Laoso Sene
Leasi Palau		

***Sui o le Vaega o Faigafaiva***

Tauaefā Autalavou (Alii Ofisa Sinia, Upolu)	Maatui Filifili (Alii Ofisa Lagolago)
Totive Aloaina (Alii Ofisa Sinia, Savaii)	Solomona Tufuga (Alii Ofisa Lagolago)
Tafatoa Ferron Fruen (Alii Ofisa, Upolu)	Taumoe Sau (Alii Ofisa Lagolago)
Malaeulu Mamoe Malolo (Alii Ofisa Savaii)	